

39580/A

F-XII-f

18

PALLUCCI

2

R A T I O
FACILIS ATQUE TUTA
NARIUM
CURANDI
POLYPOS.




V I E N N Æ,

TYPIS ET SUMPTIBUS JOANNIS THOMÆ TRATTNER
CÆs. REG. MAJ. AULÆ TYPOGRAPHI ET BIBLIOP.


M. DCC. LXIII.





L. S. D.

NAT. JOSEPH. PALLUCCI...,



*onus labitur annus, ex quo
perutilem hanc, Polypos
curandi Navium, excogita-
vi, adhibuique Methodum. Primum
omnium innotuit Illustriss. Lib. Bar.*

P R Æ F A T I O.

van Swieten, cui & ea cessit, quam suo calculo comprobarit; postmodum novere, qui Viennæ præstant medici, ægrisque commendarunt: Inter externos vero, testem, ac laudatorem habuit præclarum Gillot, Medicæ Facultatis Parisiensis Doctorem, qui hac in Civitate princeps, dum penes Regis Galliarum Legatum degeret, ægros mea sub cura invisere, ab annis jam restitutos expendere, gratulari mecum, humanissimè voluit; Id & eximius de Livernet, Chirurgus Parisiensis.

Cur

P R Æ F A T I O.

*Cur vero hanc ipsam Methodum
evulgare distulerim, iis maxime sua-
dentibus, queis obsequi laus erat, de
industria id factum velim putes, ut
quæ nova curatio Polypi, ratione, &
experientia, præ cæteris bona suade-
batur, frequentia, & varietate ca-
suum vel optima probaretur.*

*Quam igitur in tui commodum
adinveni, perfecique Rationem curan-
di Polypum, eammet, prout revera
iteratis curationibus faciliorem, tu-
torem, ac præ aliis innocentiorum se*

P R Æ F A T I O.

*prodiit, grato, quo soles, animo sus-
cipe; nec non ulteriores conatus tuo,
vel ipse favore, benevole Lector
favere perge.*



CA-



C A P U T I.

*Quid sit, qua causa, quaque lege naribus
innascatur Polypus.*



Dirissimis morbis, quibus teritur
vita mortalium, accensetur
& Polypus, Polypus in-
quam Narium; quem, prout inspectes,
sive relate ad partes, quas occupat,
sive ad functiones, quas impedit, id morbi
genus facile nosces, quod symmetriam
turpiter lædat, respirationi obsit, chy-
lum pervertat, indeque (ne memorem
inflammationes, immanesque dolores, Po-

lypum, qui malignæ fit indolis, concomitantes) quod demum Cacochymiam inducat, mortem inferat.

Enimvero Narem, cui interne adnascitur Polypus, indecore distendit, impedimento est, ne per eam respiratio fiat, vocem obscuram, & inter dormiendum stertorem facit, olfactum adimit, gustumque obtundit, nec non reliqua graviora, quæ exinde subsequuntur incommoda, excitat: quandoquidem coacti ægri os continue apertum habere, ut inde, narium occlusa via, spiritum trahant, emittantque, nulli dubium, quin externus aer in os, diu, noctuque patulum, illabens, tenuiores, quos evehere potest, humores secum rapiat, unde

unde faucium exsiccatio , tenacioribus vero , qui remanent in crustam , veluti pastaceam abitis , glandulas jam inde salivales oblitas , obteatasque , ne libere fluant , sensiles vel nervorum papillas implexas , atque obtusas , probe intelligimus. Quamobrem humore subtiliore , qui ingestis commisceri debuisset , defraudato chylo , crassior hic , minusque vasis lacteis ineundis aptus evadit , ut inde universa corporis œconomia turbetur , inducaturque Cacochymia , prout sæpe numero obvenire posse , & ratio , & exempla demonstrant.

Pejora adhuc timenda supersunt , ubi Polypi ea fit luxuries , qui adeo crescat enormiter , ut per posteriores Narium

aperturas in usque guttur descendat: tum enim præter alimenta, quæ impedit deglutire, spiritum intercipit, atque, ut verbis utar ipsius Celsi, homines strangulat.

In describendo Polypo variant quidem authores: videtur Hippocrati gurgulioni assimilandus, id quod non immerito; quandoquidem diducta Nare, ea cernitur substantia Polypi rubra, teres, oblonga, ac illa fit gurgulionis, eoque mobilis in Polypo, qui benignæ sit indolis, apparet, ut prout spiritus vel emittitur, vel attrahitur, egrediatur, regrediaturque vel Polypus.

Alii dixere Polypum (a πολυς, & πᾶς), ac si pluribus constaret pedibus,
 seu

feu radicibus, quemadmodum de marino Polypo verum est: at hæc Narium Polypi descriptio minus certe veritati consona videtur; cum jugi observatione, tam in vivis, quam in mortuis iterata, compertum sit, unica tantummodo radice, quæ farmentum dici posset, Narium parietibus adhærere.

Hinc, si quæ sit piscem Polypum inter, & hanc morbi speciem analogia, ex ea inferenda videtur, qua piscis Polypus gaudet facultate, scissas nimirum sibi partes ubique reproducendi, prout funestissime quidem hac ferme ipsa facultate pollet Narium Polypus, qui, ubi maxime non ea, qua par est, methodo curatur, citissime recrefcit.

Nobis vero quadrat Narium Polypi definitio: quod sit præternaturalis productio substantiæ æmulæ carni, Nasi cavitationem, vel unicam, vel utramque opplens. Hæc si anatomice examinetur, apparet ubique fibris, atque lamellis composita, eoque compactior, quo vetustior Polypus; licet exterius rubella, intus vero, ut plurimum subflava est. Præter nonnullos fulcos, qui Polypi meditullium fere occupant, nulla alia symmetrica vasorum structura donari videtur. Obvenit inde, quod ejusmodi substantia, à nonnullis caruncula, farcoma, hyperfarcoma etiam vocata, nunquam vero pro carne, proprie dicta, atque perfecte organizata, sed tanquam
spu-

spuria , ac veluti naturæ lusus habenda.

Referret dirissimi hujusce morbi causas agnoscere , præterea leges intelligere , quibus spuria hæc innaturalis , atque morbosa caro naturalibus partibus , narium videlicet parietibus adhæreat : Verum non finit instituti ratio hac in indagine hæerere diu. Tantummodo , quæ experientia suppeditat intellectui , hæc , si quo modo ad artis emolumentum , ac miserorum commodum conferre possunt , candide dicam.

Authorum communis opinio est , maxime Cl. Heisteri , oriri Polypum ex membrana pituitaria , ubi una , alterave ipsius glandula obstructa sit , quæ sensim

ex

ex noxiis affluentibus humoribus præter naturæ fymmetriam augeatur. Porro ex hac opinione confequitur, ut Polypus, de quo fermo instituitur, nihil aliud fit, quam quædam morbida glandularum, & fpongiofæ ipfiusmet pituitariæ membranæ expansio, atque prolongatio; cui excitandæ, tanquam causæ internæ promoventes, concurrant humores viscidi, qui prout in præfatæ pituitariæ vasculis hærent inspiffati, tumorem, Polypum dictum producant; causis vel externis, ut plurimum accedentibus, uti sunt lapsus, ictus, unguium affricus, & id genus alia.

Plura obstant, quo minus ejusmodi opinioni assentiri valeamus; suadentibus præ-

præprimis sensibus , ne ulli alteri substantiæ , quam sanguini , & viscido appellenti humori causam , cum internam excitantem , tum materialem & efficientem Polypi attribuamus. Id maxime , cum nudis oculis identidem videre contingat , ex solo affluente sanguine oriri Polypum , absque eo quod vel minimum vestigium , ac lineamentum ipso in Polypo videre detur partium organicarum , præexistentium , unde liceat inferre , glandularum expansarum , nec non membranæ pituitariæ substantiam ad ejus formationem concurrisse. Rem ita se habere , sequens , qui (omissis aliis) affertur casus mirifice probat.

Femina

Femina Viennensis, fortunæ bonis satis donata, ætatis suæ quadragesimum attingens annum, temperamento sanguinea, uti rubor faciei, aliaque signa testabantur, succis vero mediocriter referta, ac narium hæmorrhagiis valde obnoxia, instantibus maxime catameniis; initio anni 1754. me convenit, ut sibi laboranti Polypo, ab hæmorrhagia ante triennium enato, dexteramque narem, summa cum ægræ molestia, penitus opplente, succurrerem.

Polypus alte infixus, colore subrubens, indolens, ac flexilis erat.

Vulgarem Chirurgorum extirpationem, quæ volsella, seu forcipe tentari solet, ipse reformidans, è re duxeram præferen-

ferenda media, quæ solertissimi Levret industriæ accepta referimus. Ast cum horum applicatio hac in circumstantia nec minimum haberet locum, nolens, volens, dum improbæ ipse methodo me committo, majori, quoad fieri possit diligentia, Polypum intra vossellam abreptum, eumque blande inversum, brevi tandem integrum evelleram. Cœpit illico vehemens sanguinis distillatio, quæ nullatenus sisti potuit, quin prius, aperta Saphena, potenter à Capite revelleretur.

Biduo effluxo, remotisque turundis in Narem pridem inductis, lætabamur, eam penitus evacuatam, atque liberam oculis inspicere. Interim cum vehementi sternutandi stimulo excieretur, nec se

valeret ægra compescere, iterum sanguinis extillatio; unde, & obscurius vocem emitteret, ac fleret misera, ne novo Polypo corriperetur.

Admoto ipse lumine dum narem introspicio, en totam grumo sanguinis repletam video. Studui pro posse ægræ animum erigere, spemque feci, & hunc abiturum, quem tamen exerere ausus non essem, cohibente me adhuc majoris hæmorrhagiæ periculo. Id consilii cœpi, ut turundulas, vitrioli cœrulei dissolutione madidas, in antrum naris, prout spatium ferebat, immitterem, fasciamque adhiberem. Exin quietem, atque diætā ægræ commendans, abivi.

Etsi turundula diu, noctuque adefset in nare, haud tamen impediri potuit, quin novus Polypus citissime erumperet: vix enim altera hebdomade effluxa, ac æque grandis, ut prior, inspiciebatur Polypus; qui quidem initio ruberrimus, albescebat indies, quæque in ejus superficie eminebant vesiculæ, brevi lapso tempore adeo exinanitæ, atque disperditæ, ut tota inde enati Polypi superficies terfa, & nitida videretur.

Oportuit novum Polypum remove, quippe qui quam molestus. Noviter extractum in vitrum injeci, aquam puram superaffudi, dein, & nitri dosis, prout in aqua solvi poterat; aquæ volumen, ut Polypus quodammodo innataret,

frequenter agitando. Vitrum denique charta texi, atque adjecto ligamine exacte clausi.

Sexto ab immerfione die, in albam mucositatem abiit Polypus, inque fundo vitri subfedit.

Altero istiusmodi abrepto Polypo, nec misera alleviabatur: bimestri namque vix emenso spatio iterum adiit me, Polypum æque grandem, ibidem & loci natum, perditæ dolens. Narravit, & hunc lenta ex hæmorrhagia incepisse. Tercio, & hoc Polypo, quem in spiritu vini suspensum asservo, feminam liberaui, in qua vero, prout tanta ad sanguinem fundendum inerat dispositio, miraque adeo ad coeundum ipso in sanguine

dia-

diathesis, fuit fane, quod Polypum recidivum merito timeremus.

Tristem casum viderat, ejusque una mecum miserebatur Ill. v. Kesler Augustiss. Archiater. Mihi vero haud novus contigit, qui in amplissimis nosocomiis, quæ ad decennium Florentiæ Patriæ, atque Parisiis frequentaram, etiam, atque etiam simillimos animadverteram. Quinimo nec ab similem arbitror, quem celeberrimus Heisterus refert (Inst. Ch. Cap. de Polypo narium) hisce verbis: Femina nobilis, narium hæmorrhagiis obnoxia, post subito suppressam hæmorrhagiam, carunculam carneam in sinistra nare sensit.

Hæc , & relata feminæ Viennensis historia , præter alios , quos brevitatis ergo casus referre omittimus , ejusmodi plane esse videntur , quæ omnes , quoad genensim Polypi, excutiant tenebras , idque luminis affundant , relate ad causas Polypum producentes , ut plane mirari subeat , adeo invaluisse opinionem , quæ inflatis glandulis , elongatis vasis , relaxatæ , atque expansæ membranæ pituitariæ productionem Polypi attribuit. Nam præterquam quod in educto , atque anatomicè inspecto Polypo nil horum ullatenus deprehendatur , vix unquam concipi potest , quomodo brevi adeo tempore ex commenta prolongatione , atque dilatatione , quavisque etiam alia præ-

ten-

tenſa partium degeneratione formetur Polypus? cum hæc omnia longe diuturniori temporis intervallo indigeant, ut contingant, ac requirat Polypus, magnam sæpenumero in molem ut excrescat.

Hiſce ſedulo expenſis, conſultius duximus Polypi ſubſtantiam, ejusque geneſim, prout ſenſibus magis obviam, ac familiarem, à ſola ſanguinis conflua, & concreta materie repetere, ab ea (inquam) ſanguinis materia, quæ in formam animaleſ internæ ſubacta, ac intimius perfectæ, ac prædiſpoſita, vel dum foras erumpit extra vaſa, ſuam indolem, nempe phyſicas, quas à natura vires fortita eſt, tueri capax, eam, qua pollet in maſſam aliquam informem, ac

spurio-carneam cœundi, facultatem ex-
erit in Polypo.

Duo plane sunt, si quæ forte admirationem aliquam, atque difficultatem parere possunt: asserta metamorphosis, qua materia sanguinis in massam spurio-carneam abit in Polypo; præterea indoles illa, aut physicæ vires, queis instructa materia sanguinis, in Polypum valet concrefcere. Ast nonne ingesta quæque omnia, olera, legumina, carnes igne paratas, aliaque id genus multa abeunt in sanguinem? Porro si quæ sit relatio hæc inter, & sanguinis substantiam, lubeat investigare, nullus eam, vel lincæus oculus deprehendet; continua vero alimenterum in sanguinem metamorphosis adi-

mit

mit stuporem; aut si quæ subeat admiratio, eos afficit, qui maxime ingentem naturæ apparatus, quo tantum ipsa operis molitur, & perficit, probe noscunt.

Ast corpus animale præfatis alimentorum generibus nutritur, jacturis reparatur, augmenta capit! Numne quod gestantes feminæ, atque lactantes deferant ad sætum, vel extillent nato, panem, olera, carnes, prout ab ipsis ingestas, genera quidem adeo longe alia a prolis substantia? Num quod Pueruli, adolescentes, juvenes, & sic loquendo, quas ciborum species deglutiunt, ad partes corporis alendas, reparandas, augendas, ipsissimas transmittant? Minime gentium!

Primo enim quæ ab uno, alterove vegetabili, atque animali regno, ore assumpta, atque subacta deferuntur ad stomachum, in Chymum ilicet converti, postea in verum chylum, denique in sanguinem transmutari noscimus omnes, unde cæteros corporis humores discedere, carnem ipsam, & ossa dependere, adeo certum est, ut ptopterea non absque ratione scripserint veteres, corpora iis constare, quibus nutriuntur.

Itaque concludendum, ingesta non ea sub forma, qua sunt, nec immediate in firmam substantiam animalis transire, sed per varios successivos gradus nativam deponere, novamque formam animale substantiæ corporeæ nutriendæ, reparandæ,

dæ , augendæque congruam, sub specie sanguinis, vel feri, cum eodem admixti induere. Sane hic naturæ opus, hic labor ! cui absolvendo ingens ille apparatus , anatomicum oculum non latens, qui quidem cum adeo multiplicem, atque compositum se prodat præ illo, quem impendit natura, ut sanguis in firmam animalis substantiam coalescat (quiete enim, ac sola prætereuntium particularum pressione id consequi videtur), dicendum est, quod si transmutatio ingestorum in sanguinem non nisi multiplicibus e mechanicis mediis, ac per tot recensitos gradus perficitur ; eo quod summa distantia, ac discrepantia sit formam inter ingestorum, & sanguinem ; longe minori-

noribus e mechanica auxiliis absolvitur nutritio corporis, augmentatio, resectio, verbo sanguinis in firmam animalis substantiam transmutatio; prout major viget inter sanguinis particulas ad coëundum physica dispositio, nec non mutua earumdem cum præexistentibus animalis partibus affinitas.

Cum igitur ratione mutuæ hujusce affinitatis, qua pollet sanguinis materies relate ad partes corporis præsistentes, sanguis una cum ipsis partibus ita valeat concrefcere, ut vera inde caro, ossa, &c. resultent, majora, minoraque vasa reficiantur, atque augeantur, prout theoria nutritionis, & incrementi animalis apprimè intelligimus: sic ratione physicæ,

at-

atque congenitæ dispositionis , qua gaudent sanguinis particulæ , ut una coëant , ubi nullus intercedat partium animalis præexsistentium concursus , in firmam substantiam , non carneam , sed spurio - carneam concrescunt ; indeque ne dum narium Polypus , verum , & molæ , vel substantiæ polyposæ in utero , a retento sanguine concretæ , præterea Polypi cordis , aliæque substantiæ non absimiles , intra tumores aneurysmaticos vel a nobis observatæ.

Sed quid ultra immorandum in exponenda physica particularum sanguinis dispositione , sive ingenita ad una simul coëundum proclivitate : multo minus elaborandum est , ut suadeatur proprietas ,
qua

qua sanguinis particulæ una coeuntes in definitam , atque specificam substantiam spurio-carneam , seu quæ carnis primordia , stamina , lineamenta , fragmentula præferat , condensentur : Præter enim quam quod utrumque exemplis confirmetur in succis terrestribus , lapidificis , salinis , nec non vegetantium , qui , dum a statu fluiditatis ad illum transeunt consistentiæ , propriam , atque specificam sui formam exprimunt , ac sub figuris sphaericis , mamillaribus , conicis , cubicis , &c. sensibus se produnt ; unusquisque pro luitu experientiam capiet in sanguine , modo sua utens diligentia portionem sanguinis arteriosi intra duas chartas , sive lintea recipiat , ac sub aëre tepido premat

tan-

tantillum digitis, ut superfluens humiditas assorbeatur; & jam intenta acie deprehendet, præter ea, quæ utraque charta, sive lintea, signa reliquere, distincta & carnis staminum vestigia.

Hinc non perperam æstimarunt plures, sanguinem habendum pro complexu staminum sive fragmentulorum carnis, quæ orbata suo naturali vehiculo, hoc est fluidis intermediis intra quæ suspenduntur, ac quodammodo disgregantur, ne coëreant (id quod perquam frequens, dum maxime motus tum externi, tum interni validiores præcesserint), mox ea met stamina in grumos, ac massulas abire, vasa obstruere, circulum intercipere, homines denique, nisi opportune
suc-

fuccurramus interimere, hæc omnia gravia ex ea coëundi sanguinis proclivitate manare indubium est.

Ea vero proclivitas non quoad omnes eodem modo se habet, sed pro temperierum, morborumque diversitate, plurimum quidem variare & illa solet. Præterea non coëundi tantum inter sese particulæ facultate gaudent, sed etiam cum aliis præsistentibus partibus conjungi appetunt. Quod cum perenni nutritionis exemplo demonstratur, maxime vero confirmatur, & illis adhæſionibus, quibus Polypi cordis, molæ uteri, concretiones polyposæ tumorum aneurysmaticorum cum vicinis partibus tam firmiter adhærent, ut vix cultro ab iis semoveri possunt.

possint. Quamobrem fluida substantia sanguinis habenda est, nedum suas inter partes concreescere potens, sed etiam vasculorum labiis, atque parietibus unde effluit, aut quos tantummodo tangit, cohærere capax.

Hisce præhabitis facile nunc ratio se prodit, atque modus, quo narium hæmorrhagiæ succedit Polypus; facilius adhuc concipitur habita consideratione ad vasorum structuram, unde sanguis effluit, nec non ad velocitatis momenta, quæ infumit sanguis effluendo.

Quoad vasorum structuram, nullus inficias ierit, cuique arteriolæ rubræ, per narium substantiam passim effusæ, atque distributæ, eandem structuram esse, ac

majori cuicunque vaforum, pluribus nempe tunicis non solidis, atque compactis constare, sed quæ perviæ sint, vasculisque mire decrefcentibus refertæ ita, ut quodlibet vas, unde sanguis paulo sensibilius erumpat, non pro simplici habendum sit, sed veluti complexus vasculorum ulterius decrefcentium: Quot vero gradatim exiliora id genus vasa, vel rubra, in tunicis cujusque vasis aliquanto majoris extent dispersita, atque insculpta inferimus ex eo, quod ultimum vas rubrum comparari soleat densitati 10.^{mæ} partis capilli humani.

Ad alterum quod attinet, nempe qui fit impetus, atque velocitas, qua sanguis è disruptis vasis pro diversa eorun-

rumdem diametro erumpit foras, est plane, quod ex ipsa venæ sectione colligamus. Hominis namque horizontaliter cubantis secta jugulari, mox sanguis grandi impetu profiliens, magnam describit parabolam; minorem ex dissecta vena ad flexuram cubiti in medio sita, longe adhuc minorem dissecta in metacarpio salvatella, ita proinde, ut motus ille, atque velocitas semper languidior fit, quo vasa extant exiliora, atque a motus centro longius distent.

Propterea observamus, sanguinem ex tenuioribus vasculis extillantem tam lente exire, ut vix valeat eorum deferere limbos, econtra iisdem adhæreat, citoque coalescat, nisi novo succedente latice alluatur.

Hæc dum fedulo expendimus, in eam sententiam adducimur, ut nulla disrumpatur in naribus arteriola, unde sanguis paulo sensibilibior prodeat, quin insimul plura exiliora vascula ejusdem arteriolæ insculpta parietibus disrumpantur, quæque cum necessario sint illamet exiliora, hinc & impetus humorum inde prodeuntium longe minor, atque languidior alterâ (hoc est sanguinis ex arteriola directè erumpentis velocitate) erit. Quamobrem relatè ad narium hæmorrhagiam videntur pluris esse faciendæ (ut narium Polypi ideam concipiamus) binæ illæ humorum prodeuntium columnæ, quarum una dicetur media, quia ex medio, seu præcipuo vase prædit, altera autem late-

ralis, quia ex vasculis parietum illius directe scatet.

Porro hac duplici animadversione non mediocriter adjuvamus, ut Polypi initium, & incrementum intelligamus. Initio quidem prodit Polypus sub mera grumi sanguinei forma, qui sensim consistentiam acquirit spurio-carneam.

Grumus ille vero dupliciter inducitur, arte nempe, sive natura : arte dum quædam disruptis vasis applicantur, quæ vi præstant coagulandi sanguinem; ad hæc Agaricus maxime referendus, cum viderimus tam valide nonnunquam egisse, qui ad medietatem amputati cruris applicatus sanguinem non tantum extra vasa,

sed etiam intra vasa, ad Iliacorum vasorum initia usque constringeret.

Fatendum vero prudentiori applicatione illud postea declinatum infortunium: quibus vero cautelis uti debeat, perite, clare, copioseque primo nobis, causa præsertim curæ Aneurysmatis, nec non alibi pluriès tradidit Præclarus Morand.* Nostri vero refert rationem indagare, unde grumus ille sanguinis ad labia, atque extrema vasorum, ex quo immediate substantia spurio-carnea, sive Polypus excrescit.

Enimvero cum primum arteriola innare disrumpitur, vel ad hiatum usque
rela-

* Vid. Acta Acad. Reg. Ch. Paris. Tom. II, III.

relaxatur, mox sanguis extillat, ea ut plurimum copia, ut intra horam interdum ad libras effusio fit. Tum columna humorum media, seu quæ a principe vase dimanat, secum abripit lateralem. Ubi vero præcipuum vas sanguinem fundens incipit evacuari, indeque impetus remitti, columna lateralis proculdubio non amplius a media distracta est; quamobrem incipit humor, qui ex circumferentia extillat, quiescere, limbis disruptorum parietum, pro ea, qua pollet cum eorundem substantia mutua affinitate, adhærere. Ast ubi hæc adhæsiō contigerit, facilè noscimus, jam speciem incipere mollissimi quodammodo, atque viscosi tubi, sub forma sanguinei grumi

oculis intuentium sese exhibentis : cui successive confluentes intra grumi cavitationem adhucdum affusæ guttulæ sanguinis, proprioque pondere, atque volumine mollissimi grumi latera urgentes, ut cedant, ac dilatentur ; Sequitur inde, quod quemadmodum intima pressio confluentis sanguinis universe urgens, magis vero aggravans ad fundum noviter enati grumi, ratione ponderis, esse debet ; sic eo magis augeri debeat inceptus Polypus, & eam formam sacci in ampullam desinentis concipere, sub qua se prodit ; maturari vero quodammodo, ac indurescere in eam substantiam, et consistentiam spurio carnis, prout magis a basi recedit, aërisque actioni fit pervius, & accessibilis.

For-

Forte eo ipso modo, atque lege nascuntur illæ, vel massulæ polyposæ, carunculæ communiter dictæ, in vesicæ collo, sive urethra, ipsamet in vesica, intra vaginam, in uteri cavitate, vel ad confinia intestini recti intumescentes.

Polypi vero, qui intra majora vasa formantur, maxime prope cor, atque in ipsis tumoribus aneurysmaticis, non alia ratione formari videntur, ac in aquæ ductibus ad internos parietes, ex advectis cretaceis calcariisque particulis, crustæ coalescunt, quæ primo cavitatis circumferentiam pro maxima parte occupantes, sensimque ad axim accedentes, totum subinde tubum obstruunt. Sic in vasis majoribus hac lege enatæ polyposæ con-

cretiones, prout in aquæ ductibus quivis fistitur, & intercipitur motus, atque fluxus aquarum, sic animalium humorum motui, ac circulo obstant illæ, ut qui ejusmodi infirmitate laborant, misere pereant.

Coëterum longe absumus, qui nonnullorum exemplo ad speciem Polypi alios narium tumores referamus, prout sunt Tophi, Steatomata, alique tumores ciliici, nares quidem invadentes; ast qui, uti longe aliùs naturæ sunt a natura Polypi, longe & alia efformari lege, & methodo tractari, res pro comperta, ac jugi observatione fatis explorata est. Eominus Polypis accensendas puto nonnullas vesiculas, a sola interdum substantia pitui-

pituitæ , intus in naribus concretæ , adnascentes , quæque proinde hydatides meliori jure appellari merentur : Hidatides (inquam) qui prout leviter adhærentes , parvo molimine removentur , multoties etiam cum mucro ejiciuntur. Nunc autem de veri cura Polypi agendum.

C A P U T II.

De Polyporum Narium Curatione.

Dum præcedenti capite in hujusmodi Polypos excitantes causas paulo diligentius , ac antea ab aliis factum fuerat , inquireremus , a magis recepta quidem opinione nonnihil recedere debuimus , ut quam sensus , atque ratio magis sua-

suadebant, amplecteremur, indeque morbi perfectiorem ideam haberemus. Neque ideo hoc factum, ut exinde curationis nostræ methodo brevi mox describendæ magis faveremus: namque respectu hujus perinde est, five Polypus ab inflatione, atque dilatatione alicujus e pituitariæ glandulis, ipsiusque pituitariæ expansione dependeat, five immediate a solo sanguinis, aliorumque humorum influxu, atque coalitu: Probe enim novimus, nullam glandulam, nullamque corporis membranam ex se ipsa turgere, atque intumescere, sed tantum ob materieï expandentis influxum. Quare dum cura Polypi assumi debet, duplex indicatio necessario habenda; removendi nempe Polyp-

lypum præsentem, novumque influxum præcavendi. Utramque sane indicationem ad votum implet simplicissima nostra methodus: quæ tamen non prius describenda, quin aliqua saltem perfunctorie de aliis methodis præmittamus.

Has methodos vero curandi Polypos narium multas quidem esse, scire facile est, uno saltem Hippocrate lecto: posse tamen omnes ad sex contrahi sequentes non veremur asserere. Harum prima intra volfellam, seu forcipem, vel etiam laqueum susceptus Polypus extrahitur; altera autem præscinditur; tertia puncturis, vel scarificationibus aggreditur; quarta ignitis ferramentis aduritur; quinta medicamentis corroditur; sexta denique cum
filo

filo serico, vel lineo, multiplici quidem artificio ligatur.

Ratio tamen, atque experientia suadent, nullam ex iis methodis extare, quæ permultis incommodis, atque difficultatibus non sit obnoxia: quandoquidem extractio, priori loco recensita, fibras, vasaque lacerando, dirissimos excitat dolores, atque hæmorrhagias promovet, quarum causa, præterquam quod ægri vita periclitetur, vix, aut saltem raro sanatur Polypus. Mittimus errores hujusce occasione commissos, dum quæ naribus sunt a natura datæ eminentiæ, loco Polypi ingenti vi immaniter delvebantur, quod quidem gravissimæ noxæ genus actu, quo hæc scribimus, ponit
ob

ob oculos juvenis ex Academia Neostadiensi, qui postquam aliorum conatus inaniter obierit, adiit nos, auxilium efflagitans. Speramus afferre, Polypum removendo, quam primum adultior factus, magisque instituendæ curæ nostræ aptus evadat. Quo vero ad illata mala; veremur, ne iis reparandis sufficiamus.

Præcisio Polyqi non minus (causa hæmorrhagiæ) periculosa, ac ipsa extractio. Idem ferme sentiendum de puncturis, atque scarificationibus, aliunde inanibus. Non meliora auspicanda ex ferri applicatione candentis, cum ea sit narium fabrica valde fragilis, habeatque cum cerebro, ejusque membranis multam quidem connexionem. De corrosivis vero,

cum

cum hæc nullatenus extirpent Polypum, ut plurimum eo irritant, ut in posterum tangi renuat: quamobrem ab iis cavere sane consultius.

De ligatura longe aliter: hanc procura præferendam suadent firmissima artis principia, ratio, atque experientia; dummodo extent media, atque instrumenta illimet ineundæ magis apta: namque ligatura utentes, unica fidelia, sic dicta, duos parietes infimul belle dealbamus; dum ejus ope Polypum, qui adest, removemus, unaque cavemus, ne adolescat alter; quod novissimum ex præcedenti emolumento consequimur.

Polypus enim etsi non ea gaudeat structura, qua cæteræ corporis partes dona-

donatæ sunt, haud tamen caret poris atque fulcis, per quos humorum influxum recipit, sustentatur, ac sensibilibiter augetur. Humoribus ergo interceptis pereat, & ipse, quemadmodum cæteris cum animalium, tum vegetabilium partibus obvenire solet, necesse est. Hoc plane obtinemus, dum congrua ligatura juxta basim arcte constricto Polypo, pars ea cogitur, quæ sanis præexistentibus narium partibus adhæret. Enim vero hac sola ad basim constrictione adhibita, omnes pene delentur, quotquot cum partibus præexistentibus fulci communicant; eo quod eorum latera, atque parietes hoc modo cogantur in magis compactum, magisque breve, atque impervium vo-

lumen consolidari: prout vero ope ligaturæ in compactius volumen cogitur basis Polypi, sic induerescit, ne ultra in posterum dissolvi patiatur, accedente maxime physica illa ad coeundum proclivitate, qua in suis intimis, non æere induratis, elementis, sive fibrilis caro quælibet donata est.

Plura sane in corpore humano extant exempla, quæ physicam ad coeundum dispositionem inesse probent elementis sive fibrilis partium, præcipue mollium, modo juxta se positæ aliquandiu contineantur. Id ars confirmat, morbi, iufortunia: Ars, qua mox editi foetus ligantur vasa umbilicalia, ex quibus nihil amplius effluit; illa, qua cætera in
majo-

majoribus amputationibus vasa confiringuntur, unde humoris nihil emittitur, eo quod tali vinculo ita conglutinentur in unum parietes vasorum, ut ne amplius impetu vitæ seu circulationis disjungi valeant. Morbi hoc ipsum testantur plurimi: Si enim intestina aliena in sede aliquandiu violenter demorentur, procul dubio cum partibus contiguis ita copulantur, ut vix cultro divelli possint. In iis vero, qui pleuritico morbo periire, nihil frequentius pulmone Pleuræ accreto. Infortunia quis numerat, hanc elementorum fibrarum in mutuum coalitum propensionem, confirmantia? Brachium Thoraci accretum, digitos una

coalitos in infantibus vidisse contigit, ob grande infortunium in ignem delapsis.

Cum igitur ligatura sit, quæ omnes fulcos, fibrasque Polypi basim, seu partem ejus, sanæ contiguam constituentes amplectatur, comprimatque undique versus commune centrum; hæc duo tutissime præstat emolumenta: Primò impedit, ne quid humoris ultra prætereat in Polypi sustentationem, quare contabescat, ac decidat oportet: Insuper fulcorum, atque parietes in unum compingendo, nec non universam Polypi substantiam, quæ paulatim evadit tabida, atque exsucca, resecando, omnia hæc in unam superficiem planam imperviam, à sana non dissimilem, immutat.

Hinc

Hinc factum est, quod, cum ligandi methodus longe admodum præstet cæteris, non mirum, si plurium jam celebrium virorum ingenia torserit sollicitudo mediorum, quibus commode posset ligatura adhiberi. Hos inter non mediocriter inclaruit solertissimus Levret, Chirurgus Parisiensis, ibique Parisiis obstetricia in arte primarius, qui pro summo, quo pollet ingenii acumine, plura sane excogitavit, ac speciali suo tractatu evulgavit subsidia, quibus labilis ansula, qualis ex filo serico, vel lineo conficitur, ad basim usque, seu radicem Polypi deduci posset. Ast fatendum illorum usum sæpenumero plus negotii, atque incommodi facessere, quam utilitatis. Ex eo

præfertim, quod raro admodum proportio illa, atque narium capacitas subsistat, sine qua illorum ufui, atque applicationi nullatenus locus est.

Id fane, quod, cum vel ipse aliquoties in praxi doluerim, longe aliam, a cæteris hucusque notis, methodum ligandi Polypos, propria tantummodo opitulante industria, excogitavi, adhibuique, seclusis omnibus quotquot aliorum mediis.

Nova hæc curæ Polypi instituendæ ratio, quamvis rudis adhuc, & expolienda, menti primò subiierit, sequentis vero experimenti occasione adeo expurgata, atque perutilem successivis in casibus reperimus, ut pro voto debellando

Polypo cessisse simplex inventum valde lætemur.

Labente 1754. adibat me puer Studiosus, levamen querens Polypi prægrandis, in nare dextera alte radicati. Ligare hunc statui, ac primò media solertissimi Levret adhibere aggressus, experior angustiae causa eorum applicationi deesse locum; quamobrem alias industrias tentare coactus, ad sequentem diem ægrum dimiseram.

Interea ex cathetere argenteo partem abscidi, cannulam nempe rectam, duobus pollicibus longam; in ejus cavitatem argenteum filum duplicatum induxi, & anfulam inde, ut patet Fig. 2.^{da} confeci, qua Polypum ligarem. Cum

puer statuta hora rediret, curavi, ut adversus lumen confideret. Tum accepta volsella, pro extractione Polypi adhiberi solita (Fig. 1.^{ma}), clausam hanc (ex parte A.) per spatium anfulæ trajeci, postea modice diduxi, Polypo dein alte prehenso, atque constricto, ligavi infimul annulos volsellæ: Superstex vero ab hac ligatura filum inter labia ipse susceperam. Sine manuum auxilio volsellam ita suspensam continui. Tum anfulam (A. Fig. 2.^{da}) secundum volsellæ, seu forcipis longitudinem eo direxi, ut ad Polypi radicem deveniret. Quo eam pervenisse cum resistentiæ indicio animadverterem, tum extremitatibus anfulæ (c. c. Fig. 2.^{da}) una susceptis,

tis, altera vero manu cannulam altius demittendo, prout demonstratur (Fig. 3.^{tia}) sic sensim imminuebatur anfulæ spatium, adeoque arctiori ligatura constringebatur Polypus: Ubi satis, tunc intortis anfulæ extremitatibus (ut eadem Fig. 3.^{tia} clare exprimitur), eousque firmabatur ligatura, ut ne hilum relaxaretur. Sicque operatio absoluta fuit. Remota hinc volfella, ejusque loco filamenta circa circum cannulam inducta, ne aliqua molestia ob ejus duritiem partes afficerentur, emplastro diapalmæ, foraminulis instructo, applicato, iuctaque desuper idonea fascia, ægrum dimiseram, ut sobrie, atque tranquille domi se contineret. Tribus inde effluxis die-

bus, iterum me ut adiret expresse injungens.

Statuta die totus hilaris, atque festivus advenit studens, Polypum in linteo afferens, quem bene tabidum, narransque infcio se sub somno præcedentis noctis, absque vel minimo sanguinis vestigio sponte decidisse, vix 40. horis ab operatione elapsis. Mox ad lucem conversa nare, diligenterque introspecta, lætus vidi, nihil de Polypo superesse, naremque proinde omni modo liberam. Illico replevi mollissimis eam turundulis, dissolutione vitrioli madidis, fasciaque, ut antea, desuper posita. Duodecim dierum spatio sanus, & incolumis evasit Puer.

Hoc

Hoc experimento facilitatem, atque præstantiam methodi, pro ligando, sanandoque Polypo edoctus, totum exinde ei perficiendæ animum applicui. Novæ enim sub operatione in ampla canulæ cavitate nimium anfulam vacillare; mox ideo curavi alteram confici, quæ figura 2. & 3.^{tia} repræsentatur. Est proprie cylindrum (B.) duobus tubulis per medium longitudinis suæ pertusum, in quibus anfulæ extremitates accurate continentur. Pendet ex utraque anfulæ extremitate (c. c. F. 2. 3.) fasciculus filamentonum, ea de causa adjectus, ut facilius inter digitos una, alteraque extremitas contineretur.

Verum non corrigendæ tantummodo cannulæ studere oportuit, sed & consuetæ forcipi, seu volsellæ nonnulla adjicere, quæ faciliori operationi subvenirent.

Præ aliis cochlea est, cujus binæ notantur partes, mas, ut ajunt (B), & femina (c.), quarum usus sola è figuritè inspecta dignoscitur. Præterea ita efformatæ nostræ forcipis extremitates, ut quam aptissimæ sint ad Polypumprehendendum, arctèque continendum, quin aut dilacerent, aut disrumpant. Utraque enim pars correctæ forcipis leviter excavatur, brevibusque ad instar limæ instructa in sua cavitate dentibus, sive obtusis spinulis; in medio fenestrula (A.) perfunditur, quæ omnia sane intento finisumo-

mopere conducunt. Thenia insuper adjecta est ejusdem forcipis annulis, cujus usus mox patebit.

Expositis correctionibus, refert referre modos, quibus Polypi operationem aggredimur. Ægro adversus lumen, ut antea, confidente, forceps (Fig. 1.) per anfulam (Fig. 2.) inducta, posteaque in narem demissa, Polypoque alte prehenso, blande parumper clauditur, firmaturque partis cochleæ (C.) versione. Post hæc Thenia, superius memorata, inter labia suscipitur; tumque forceps jam pene horizontaliter suspensa hæret; utraque operatoris manus jam libera est. Sinistro pollice nasi apici admota, leviter is comprimitur, ea

de

de causa, ut inde naribus expansis facilius ansula demittatur. Ad Polypi radicem, seu basim perventa ansula, tunc sinistra manu ejusdem extremitates (c. c.) continentur; dextera vero altius cannula impellitur, ut patet ex fig. 3. eaque ratione ligatur Polypus, atque constringitur.

Polypus ita constrictus, ut plurimum ante sextam diem pro maxima parte tabidus, atque exsuccus una cum ligatura sponte cadit. Ubi hoc non contingeret, videreturque paulo adhuc fortius adhærere, tunc vel arctius ligatura constringendus, vel nova, duce priori, superaddenda. Quamobrem, & hac de causa, & ob alias rationes, optime semper

per cautum erit, plures in promptu habere hujusmodi cannulas, sua ansula instructas, & pro casuum varietate diversæ etiam longitudinis.

Hactenus quo stimulo adducti fuimus, ut novam ligandi Polypum rationem conciperemus, quomodo hæc observatione, atque praxi adhuc perfectior adhibeatur, pro communi utilitate ingenue diximus. Supereft, ut ejus præstantia variis, multisque curationibus, quas faustissime hac nostra methodo contigit absolvisse, confirmetur.

Nobilis Ungarus, Lazarus Nitzky 60. annos natus, septem abhinc annis advenit Viennam, molestiarum levamen obnixe petens, quibus causa unius, al-

teriusque Polypi, vetusti, deniffimi, qualibet in nare alte radicati afficiebatur.

Extirpatio aliquando tentata, adauxerat incommoda. Ast hæc paucos intra dies dissipavit nostra superius descripta methodus. Ab eo tempore nihil amplius molestiarum in utraque nare perpeffus est; id quod candidus homo haud renuit asserere proxime elapfo anno coram etiam Clariffimo Domino Doctore Schelenberger, dum Viennæ communi nostro, pro alterius morbi reparatione, consilio ufus est.

Non minus feliciter nostra methodus cessit quoad centurionem, nomine furmont, quem mediæ ætatis virum perhumaniter curæ nostræ commendaverat Il-

Iustissimus Baro van Swieten; vetusti, durissimi, atque enormis sane magnitudinis huic Polypi erant, cum ad fauces, ad labia utrinque penderent; omnihus præterea, quæ Polypo accidere possunt, pravis Symptomatibus comitantibus; ideo solitus miserè conqueri, malle se vitam cum morte commutare, quam dolores inter atque molestias diu degere.

Extirpationem reformidans, propter ingentes, quas Bruxellis, & alibi perpeffus fuit hæmorrhagias, quibusque incolumem evasisse, miraculo referebat acceptum, ad solum horrebat instrumentorum aspectum. Suasus tandem, instrumenta in finem longe alium a nobis adhiberi, curæ nostræ se commisit. Incre-

dibili plane lætitia affectus est, cum sine molestia, vitæque periculo brevi dierum intervallo se sanum, & incolumem, vinctis Polypis, sensit. Ejus firmam, atque integram valetudinem testantur cum ejus, tum nonnullorum castrensium medicorum litteræ, queis certiores me faciunt.

Non diu post, idem Illustriss. Baro van Swieten, de præstantia methodi optime suasus, curæ nostræ commiserat D.^{nam} Zceppelin, Augustissimæ Imperatricis à cubiculis; densis hæc, atque vetustis Polypis, utraque obstructa nare, laborans, paucos intra dies revaluit felicissime. Quæ sane cura cum in conspectu universæ Aulæ contigerit, nec testibus de-

defuit probatissimis, neque remuneratione caruit, & laude, quæ summi faciendæ sit.

Non finit proposita brevitæ ultra immorari in iis recensendis Polypi curationibus, quæ etiam, atque etiam hujusce methodi præstantiam confirmant; aliunde cum fundamentis, quibus innititur, omnium simplex, ac perquam utilis probetur; nec non quivis pro lubitu, debitis cautelis adhibitis, de ejus præ cæteris efficaciam convinci possit. Id vel maxime fore confidimus, si dum rationis nostræ curæ præcipua, quæ observari debeant, retulimus; neque illa dicere omitamus, vel quæ ad curam ipsam directe pertinent, vel ad casus spectant, quos

hæc ipsa idcirco excipit, quia omni fere arte incurabiles.

Porro ut felicius, quoad ominari possit, cura perficiatur, interest præprimis ante Polypi ligaturam ægris alvum subducere, ne ob corporis quietem, fœces in primis viis nimium subsidentes indurescant, incalescant, proindeque aucto eorum volumine vasa comprimant, adque caput sanguinem repellant. Hac de causa, & alvi subductio esset repetenda, si ultra quintam diem alvus obstructa, multiplicia enim exempla cum in hac, tum in quavis alia operatione docuerunt, haud bonum esse, segnem alvum ultra illud dierum spatium permittere, etsi solo

jure

jure alerentur ægri. Antea vero sollicitanda nunquam nobis visa est.

Præterea urgeat, nec ne, Plethora, expedit antequam cura aggrediatur venam secare, iis præsertim, qui temperie gaudent sanguinea, quique hæmorrhagiæ interdum obnoxii fuere. Ast si verum, quod quo magis vasa collapsa habentur, eo citius coalescunt, idcirco parce nutriantur ægri, ne vasa multum repleantur.

Cura vero haud negligenda, quin prius perfectissime coaluerit pars, cui hærebat Polypus. Sed immittendæ frequenter sunt illæ filamentorum turundulæ molliissimæ, in solutione vitrioli antea semper demersæ, uti superius dictum est.

paratur hoc remedium addendo unciis duabus aquæ rosarum, vel plantaginis drachmas duas gillæ Theophrasti.

Ne autem ob aliquod humoribus prædominans vitium Polypus de novo in naribus erumpat, prudentiæ semper erit illud corrigere, usu nempe earum rerum, quæ magis optimæ in eum finem comper-tæ sunt. Si nimia ad coalitum prædominetur humorum proclivitas, hæc domanda remediis nitrosis, saponaceis interne exhibitis. Si affluxus nimius humoris glutinosi ad caput, ad nares, una simul revellendus, atque incidendus erit continuo emplastri usu, cervici præsertim admoti. Paratur hoc uncia una Emplastri melitoti, drachmisque tribus emplastri

stri vesicatorii ordinarii, id quod egregie præscriptum ab Ill.^{mo} Lib. Bar. van Swieten, ac frequenti usu ad varios capitis morbos expertu utilissimum.

Ast nonnunquam etiam hæmorrhagiæ in feminis, præsertim catameniis instantibus nares invadunt. Posse inde Polypum renovari resultat ex dictis. Refert igitur hæmorrhagiæ, quantum artis est, præcaveri. Huic prospiciunt venæ sectiones opportuno tempore adhibitæ, nec non ea media, quæ sanguinem ad propria loca dirigere valent. Hæc vero dum aliorum peritiæ relinquimus eligenda, quædam solummodo addere ducimus, quæ frequenti experientia pro sistenda hæmorrhagia novimus optima.

Dum sanguis effluit è naribus, oportet æger in fedili, vel lecto quietus confideat, capite retrorsum nonnihil dejecto, simulque è sola manus aquam hauriat frigidam, evomatque per os una cum sanguine ipso. Turundulæ è filis confectæ utiliter etiam in nares induntur; prodest frigidissima aqua cum linteis madidis fronti admotis.

Juvatque infimul, pedes in aquam immittere calidam: sin cesset his hæmorrhagia, tunc incidenda pedis, quæ magis turgeat vena. Sic absque ægri noxa, sedatur hæmorrhagia, ad quam præcavendam superest, ut ea solerter vitentur, à quibus, præter causas internas, solet ut plurimum excitari, prout sunt ictus,

la-

lappus, digitorum affrictus, halitus nimium fortes, ac pulveres sensilissimam narium tunicam laceffentes.

Quæ sit generaliter cura habenda Polyporum narium, quomodo tractanda, atque præcavenda symptomata, quæ Polypum vel præcedunt, vel comitantur, vel etiam curæ supervenire possunt, ubi minus caute diligenterque instituitur, hactenus dictum est. Nunc vero sermo de iis Tumoribus habendus, qui licet naturæ toto cælo aliûs, à minus tamen peritis cum vero Polypo confunduntur. Hujusmodi sunt Tophi, Steathomata, ac quædam Sarcomata, de quibus mox dicetur. Verum palmaria nimium extant

discrimina hæc inter, & Polypum, ne id genus tumores assumatur promiscue.

Ita Polypus à natura comparatus, ut magis in longitudinem, quam in latitudinem se protendat. Contrarium vero in iis omnibus obtinet. Polypus ut plurimum mobilis, atque flexilis, illi autem duri, ac renitentes. Alio insuper modo ii producuntur, aliam occupant sedem. Tophus ossis substantiam, ut plurimum obsidet, causamque agnoscit veneream. Steatoma è singulari quodam humore, in speciali cistula, pone tunicam pituitariam, collecto atque condensato turget. Sarcoma denique est prominens vera caro, ab irritamento, vel ictu, vel lapsu, ut plurimum enata, lateque expansa, orga-

ganizata, ac rubra: Solet ut plurimum supercrescere, quibus Polypus avulsus est; idque cum ob irritamentum, partiumque distractionem, tum ob sanguinis congestionem evenire putamus.

Nullus vero ex his tumoribus ea methodo qua Polypus, sed speciali medela tractari exigit. Tophi enim à causa venerea originem ducentes nullam curam præter internam admittunt. Subinde vero vel sponte, vel sub usu Mercurii flaccescunt, putrescunt. Tum quod corruptum est removendum à sano, & hocce præservandum applicatione balsami præcipue coppayvæ, quo filamenta obducuntur. Steathomata domantur caustico potentiali; ad hunc aliosque usus mirifice

va-

valet, quod ad mentem summi Boeravii (opera Ch. Pr. XIII.) paratur à clarissimo Professore Laugier. Nullum ipse id genus tumorem, qui nec bubonem venereum aggredior ferro, sed cauta solummodo hujus caustici, perhumaniter ejus ab auctore mihi elargiti, applicatione domare soleo. Id plane facilius ægris, qui ut plurimum instrumenta horrent, mihi vero commodius, qui nullam in posterum duritiem, nullosque incisionis angulos, curam protrahentes, habeo, quos timeam. Hujusce caustici vi corrodente, brevi tempore aperitur tumor, ulcus digeritur, totumque infectum dimittitur. Si . ad horæ quadrantem alicui hæreat parti, crassam escharam, brevi deciduam promovet.

Fa-

Facillime igitur hoc medio pervenimus ad steathomatis usque finem, quo evacuato, lapide infernali, vel etiam solo unguento digerente, ex Balsamo arcæi, atque tantillo præcipitati rubri confecto, consumitur sinus cistula, tumque cura perfecta est.

Sarcoma vero intra nasum excretum difficilius curatur, vincitur resolventibus, quæ sin impactos expellant humores, impediunt saltem, ne ultra excrescat sarcoma; ut plurimum natura sua albescit, eodemque in statu ad usque vitæ finem perseverat.

Nonnunquam vero Steathomata, atque Tophi adeo profunde latent, ut, nisi dissecta nare, quemadmodum suadet

Cel-

Celsus pro cura profundioris Ozenæ, descripta remedia nequeant applicari. Scimus, hanc naris incisionem ab aliquibus improbari, quod nihil durius, formæ & iniquius sit: Ast præter antiquissimi Phylosophi sententiam: quod nulla dura videri debeat curatio, unde salutaris expectetur effectus; memoriæ insuper illud Severini revocandum: non posse sæva mala, nisi sæve tractari. Suppetat vero firma curationis expectatio, quandoquidem licebit semper ardua tentare: alias si minus fælix fuerit eventus, is temeritati potius, quam peritiæ referendus nullo non tempore erit.

Ast datur narium Polypus, qui absolute attingi vetat, & utpote cancrusus,
ubi

ubi si nostra, vel quavis alia è superius recensitis methodis tentaretur, mox ingentes dolores, atque inflammationes excitaret, quæ late sese diffundentes, funestos ederent effectus.

Cura igitur hujusmodi Polypi in desperatis habenda, quippe quia omnimoda, quæ impendatur, arte, nihil ultra consequi possit, quam qui effectus caveri nequeunt, compescantur, vel nonnihil temperentur. Si quid vero majoris levaminis sperare liceret, id plane à sola cicutæ facultate, quam prout evulgata exempla, ac testimonia fide dignissima asseverant, cancris debellandis, quamvis corporis partem obsidentibus, adeo efficacem, quin ejus cicutæ usum improbe-

mus,

mus, pro cura cancroſi Polypi commen-
da us. Id ſaltem emolumenti ex interna
cicutæ adminiſtratione conſtat nobis, quod
immanes dolores, cancrum concitari ſo-
litos mirum in modum ſedare valeat, præ-
terea externa ejusdem applicatione, quod
cancroſæ carnes in putridas quodammo-
do glebularum diſſolutæ ſua ſponte delaban-
tur. Id quod ne gratis dictum videatur,
operæ pretium ducimus ſequenti caſu con-
firmare, qui ut ut à Polypo diſſimilis ar-
guatur, non levis tamen conjecturæ pro
vel cura Polypi intelligenti erit.

Femina 60. annorum horrido can-
cro mammam dexteram in duo ferme gran-
dia promontoria diſiſam habuit, forami-
ne in medio pertuſam, per quod indu-

ctus

ctus filius, in nudas atque cariatas costas incidebat.

A diu miserrima hæc, lecto a^ll^ux^a, viribus, & carne consumpta, dies noctesque vigiles præ dolorum acerbitate transibat. Omnes læsas habuit functiones; non appetebat, non digerebat, vix mente constabat. Multa fane vicinæ mortis signa aderant, cum ejus filia instare cæpit, ut ipse matrem inviserem.

Casus periculum non dissimulans innui extractum cicutæ, quo uti posset, si vellet, ad dies saltem protrahendos. Annuit misera, incipiens a parva dosi sex granorum, quam sub forma pilularum, partitis horis sumebat in die. Cum primum 20. grana jam quotidie deglutiret,

vires habuit, ut è lecto confurgeret, atque adjuvante filia, intra cubiculum deambulare. Quod magis mirandum! remissos eo dolores, ut dixisses liberali opio sopitos; quod nec mente revolvimus.

Quid vero fortis cicutæ infusio, externe adhibita, hic boni foret allatura, explorare volentes, femiunciam ejus extracti ad libram unam plantæ infusi adjecimus, eoque tepefacto bis, terque ad diem prægrandem illam cancri molem penicillo madefecimus; insperfo postea pulvere ex cerussa, mirrha, olibano confecto, ad exsiccandos, atque corrigendos olentissimos exin scaturientes humores, contegi-

gimus omnia filamentis ficcis; desuper imposito cicutæ emplastro.

Singulare plane phænomenon! quadriduo vix effluxo incæperunt illæ magis elatiores eminentiæ in glebas fatiscere, vacillare, nigricare, tandem levissima vi penicillo aliquanto excussæ, cadere. Sic mirifice procidebat ingens cancri moles: id quod vel Ill. Baro van Swieten, Nobiliss. Archiater v. Kesler, Clariss. Professores Crantz, & Gasser, inter alios plures, attente observarunt.

Annosa hæc femina ab annis in suburbiis vivere assueta, ingruente hyeme in Urbem se recepit. Qua occasione graviter commota, incepit hæmorrhagiis obnoxiam esse. Oportuit remedia suppri-

mere; ad menses vita protracta, fatis denique cessit.

Ex his, quæ ingenue retulimus, frequentia inferri posse putamus: quod cum cicuta interne adhibita acrimoniæ cancro-
sæ sævitiem obliniat, obtundatque; externo autem superius descripto usu can-
crofas carnes ita afficiat, ut jam putridæ sponte decidant, disruptis scilicet nexi-
bus, quibus invicem, vel cum fanis co-
hærebant partibus, cur non etiam, eo-
dem modo, vel in dexterato Polypo cancroso adhibenda?

Dicent, quare non vel in Polypo, qui benignæ sit indolis? Supposita ea cicutæ facultate, quæ, prout effertur, morbofas carnes ita afficit, sic digerit, à
fa-

sanis disgregat, ut demum sponte sua decidant? Ast iis reponendum, Artem non una tantummodo via progredi ad morborum profligationem: eam insuper non deferendam, quæ jugi observatione probata est, donec saltem simpliciore, ac perfectiore alteram & temporum, & casuum varietates confirment, vel eæ dominantur circumstantiæ (prout in cancroso Polypo) unde novi remedii usus necessario suadeatur. Tunc enim lapidem quemque movere, ut quid levaminis afferatur ægro, laudi fane ducendum.

Nobis vero, quam maxime arridet sanior ea regula, morbos nempe suo magis indicato, atque comperto medio, nisi cætera obstitent, tractandos; iisque magis

magisque artis subsidii incumbendum, ut perficiantur, quæ huic principio maxime quadrant. Porro quæ præter corporis symmetriam excrevere, sui ablationem indicant. His accensendus Polypus narium, vaginæ, uteri vesicæ, recti, qui ubique eadem nostra superius descripta methodo, nonnullis tantummodo pro varietate partium mutatis, (de quibus alibi) curari felicissime poterit, nisi saltem labes cancrofa comitetur. Tunc vel naturæ ipsi committendus, vel cicuta, prout præstantius hucusque in cancrum celebratum præsidium, adhibenda: ut ea saltem cancri effectus mitigentur. Equidem mitigari externo cicutæ usu, jam asseruit Cel. Ettmullerus, confirmavitque

postea exemplis multis Clariss. Archia-
ter Störck.

Cæterum quicquid de inertia cicutæ
nonnullis placeat effundere, econtra nos,
observatione præeunte, eam inesse cicu-
tæ vim reputamus, quæ proinde multis
indigeat cautelis, tuto ut propinetur.
Hinc non immerito ejus usum commen-
davimus quoad fistulas magis rebelles edo-
mandas (prout in tractatulo de fistula
lacrymali nuper edito): vidimus enim in
earum cura, cicutæ remedium, id virtute
sua præstitisse, quod à nullo alio artis
præsidio impetrare licuit. Hinc meditati,
qua de causa interne adhibita id efficeret,
probabile duximus, ut cum ad obstructa
loca perveniat, totam ibi suam penetran-

di vim pro vincendo obstaculo exerat; quod ubi minus obtineat, aliud faltem præstet, disjunctionem videlicet elementorum, unde exurgunt, nonnulla etiam interdum excitata hæmorrhagia. Sicque duras fistularum superficies à fanis sejungat, protrudat, expellat: unde, quæ prius ob eas morbosas superficies innaturaliter disjuncta erant, citissime coalescant.

Utique Mercurius, qui majora intermedia recensetur, non alia fane ratione nobis sæpe visus est, hæmorrhagias in nonnullis partibus excitare, duras ulcerum venereorum superficies exsolvere atque protrudere, parte sive sanitati pronas dimittere.

Cum

Cum vero de Mercurio opportune sermo inciderit, non abs re monere erit, hoc remedium semper curæ Polypi, superius descriptæ, adjungendum, ubicunque inter hujus præcipuas causas lues & venerea concurret. Posse vero inter ejus causas nonnunquam & hanc recenferi, nemo dubitet; cum Polypis narium, finuum frontaliū, aliarumque partium ii maxime frequentissime laborent, qui lue venerea infectum sanguinem eo habent glutinosum, ut is vena missus in crustam longe quam in pleuriticis densiorem coalescat; Insuper acrimoniam adjunctam habeat, qua vasa corrodit, & hæmorrhagias parit, unde Polypi variis in locis erumpunt; prout ex vario, atque multi-

ti-

tiplici infectorum cadaverum examine docti sumus.

Multa sane, quæ id genus repetitis dissectionibus Parisiis, atque Monspellii observavimus, erunt forte, quæ adjuvante Numine brevi exponamus; dum occasio suppetet veræ Gonorrhææ causam, & sedem statuendi, illustrandi præterea celebrem, quæ adhucdum pendet caruncularum quæstionem, nec non ad sua præcipua Capita Urethræ, atque vesicæ morbos reducendi.



Fig. 1.




Fig. 2.





Fig. 3.





799